

Innarluutillit najugaqatigiiffiini naleqquttumik najugaqartinneqarnissaminnut pisinnaatitaaffiannut FN-ip Innarluutillit pillugit Isumaqatigiissutaanut naapertuuttumik innarluutillit qanoq ittunik sinaakkusikkanik avatangiiseqartinneqartariaqarnersut pillugu apeqquteqaat aallaavigalugu Inatsisartut oqallinnissaannik siunnersuut

(Inatsisartuni ilaasortaq, Martha Lund Olsen, Siumut)

Akissuteqaat

(Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoq)

Naalakkersuisut apeqquteqaat aallaavigalugu oqallinnissamik siunnersuummut soqutiginaateqarluartumut qujapput.

Siunnersuummi inunnut innarluutilinnut atugassarititat pitsanngorsarnissaat suliassa qarfiit assigiinngitsorpassuit aqqusaarlugit suliassaammatt erseqqissarneqarpoq.

Innuttaasoq inuk innarluutilik siullertut pingaarnertullu innuttaavoq. Taamaammatt innuttaasunut innarluutilinnut siammasissumik tamakkiisumillu isiginnittoqarnissaa, inuiaqatigiinnilu sugaluartuni, Namminersorlutik Oqartussaagunik kommuniugunilluunniit, suliassa qarfimmatt ukkatarinninnissaq akisussaassuseqarnissarlu pingaartorujussuavoq. Taamaalillunilu matumani apeqquteqaat aallaavigalugu oqallinnissami takutinneqarpoq innuttaasunut innarluutilinnut atugarisaatigut pitsanngorsaasoqarneq ineqarnerup tungaatigut aamma suliniuteqarnermik kinguneqarmat.

Inunnut innarluutilinnut naleqquttunik ineqartitsinissamut apeqqummut tunngatillugu pingaaruteqarpoq erseqqissassallugu naleqquttunik illutatigut atugassa qarfitsisoqassappat inunnut nammineq angerlarsimaffimmini najugaqartunut, ataatsimoorfiusuni najugaqartunut kiisalu najugaqarfinni illersukkaniittuni najugaqartunut pisariaqartitsineq aamma atuummat. Ilanngullugulu tulluatuvoq erseqqissassallugu illutatigut atugassarititanut apeqqummi nammineq inigisat kisimik pineqanngimmata. Taamaammallu suliffeqarfiutitta pisortanit pigineqartut, soorlu peqqissaaveqarfiit, meeqqat atuarfii, illorsuit kulturimik sammisaqarfiusut, timersortarfiit il.il., kikkunnut tamanut ammatinnissaat aamma qulakkeertariaqarmat.

Illuliornermut malittarisassani nutaani takkutilersuni ilanngussartaani assiliartalersukkami erseqqissarneqassaaq illuliat tikikkuminartuussasut. Saniatigut isumaliutigineqarpoq illulianut sananeqareersunut – taamaalilluni illuliani nutaaniinnaanngitsoq – tikikkuminartuunissamik aalajangersakkat, sanaqqiinikkut allatulluunniit aqqiinikkut, eqqortinneqarnissat piumasarineqarsinnaanersoq.

Inunnut innarluutilinnut inissiatigut atugassarititat pitsanngorsaaffigineqassappata assigiinngitsunik aqqiissutissaqarpoq. Innarluutilinnut inatsisit atuuttut malillugit inissiap ilusaanut imaluunniit inissiap allanngortinnissaanut tapiiffigineqarnissaq pillugu qinnuteqartoqarsinnaavoq.

Taamatutaaq inatsisini aamma inissianik iluarsaasoqarnissaa pillugu aalajangersagaqarpoq, taannalu aqcutigalugu inissiap allanngortinnissaanut tapiissutinik qinnuteqartoqarsinnaavoq, taamaalilluni inissiaq inunnut pisinnaasakinnerulersimasunut tulluurtunngortinneqarsinnaalluni.

Allatut aaqqiissutissaq tassaavoq inissianik nalinginnaasunik sanaartortoqarnermi tamakku inunnut innarluutilinnut naleqqussarlugit sananeqartalissasut imaluunniit inuit innarluutillit immikkut pisariaqartitaannut naleqqussarlugit. Taamaaliornikkut peqatigitillugu inuit innarluutillit allanut sanilliunneqarsinnaalissapput, tassalu allat assigalugit ineqarnermut tapiissutinik qinnuteqarsinnaanissaat periarfissillugu. Taamatut aaqqiineq Naalagaaffiit Peqatigiit innarluutillit pillugit Isumaqatigiissutaannik malinninnerussaaq, tassanimi allaqqammat inuit innarluutillit innuttaasut allat assigalugit periarfissaqartinneqassasut.

Isumaqatigiissut innersuussutigalugu naalagaaffiit isumaqatigiissummut peqataasut aamma akuerisussaavaat inuit innarluutillit namminneq inissaminnik toqqaasinnaanerat periarfissaqassasq. Taamaammallu pingaaruteqarpoq aaqqiissutissanik inuit innarluutillit nammineq angerlarsimaffiminni sapinngisamik najugaqaannarnissaannik periarfissiisunik eqqarsarnissaq, taamaaliornikkullu innuttaasut ulloq unnuarlu angerlarsimaffimmiittussanngorlugit inissiisarnerit annertusivallaarnissaat pinngitsoortillugu.

Inissianik inunnut pisinnaasakinnerulersimasunut naleqquttunik sanaartortitsinissaq pisariaqartinneqarmat nunatsinni kommunit arlallit paasereerpaat. Tamanna Kommuneqarfik Sermersuumi aamma Qeqqata Kommuniani assersuutissaqartoq takoreerparput.

Illuliornernut suliniutinut nutaanut ataasiakkaanut - illunik tamatigoortunik taagorneqartunik – Naalackersuisut iluarssiisutinik ineriartortitsisimapput, taamaalilluni illuliat ilusilersorneqarlutik tamanut atorneqarsinnaasunngorlugit. Taamaammatt siunissami pisortanit illuliortoqartussaattillugu inissiat assigiinngitsunik aaqqiissuunneqartarnissaat, taamaalillutik pisariaqartitsinernik allanngorartunik naammassisinnaanissaat pingaartinneqartorujussuuvoq. Imaappoq ilaqutariinnut inuusuttunut, utoqqarnut kisermaanut kiisalu inunnut naak innarluuteqaraluarlutik nammineq najugaqarsinnaasunut. Tunngaviusoq tamanna aamma siunissami kollegialiornissani pilersaarusiornerni atuuppoq.

Inunnut innarluutilinnut atugassarititanik pitsanngorsaasariaqaratta nassuerutigissallugu pingaaruteqarpoq, suliasarlu taanna suliariniarlugu naalackersuisoqarfiit akimorlugit sulisariaqaratta.

Naalackersuisut sinnerlugit oqallittoqarluarnissaa kissaatigaara, partiillu qanoq isumaqarnersut tusassallugu qilanaaralugu.